

四庫全書

子部

欽定四庫全書

子部

玉海卷二十九

詳校官給事中_臣查善長

主事_臣祁韻士覆勘

總校官進士_臣朱

鈐

校對官編修_臣盧

遂

謄錄監生_臣

黃臣鵠

欽定四庫全書

玉海卷三十九

宋 王應麟 撰

聖文

御製詩歌

伏羲網罟詠

見樂類

神農豐年詠

見頌類

堯大唐歌

文心彫龍堯有大唐之歌舜造南風之詩二文辭達而
已大禹成功九叙惟歌唐歌在昔則廣於黃氏虞歌卿
雲文於唐時野老吐何力之談郊童含不識之歌尚
書大傳謗然作大唐之歌又見音樂詩正義六藝論云唐
虞始造其初至周分為六詩

堯歌

古今樂錄堯郊天地祭神座上有響誨堯曰水方至為
害命子救之堯乃作歌謝希逸琴論曰神人暢堯帝所
作堯彈琴感神人現故制此弄也 清廟穆兮承予宗
百僚肅兮于寢堂醞禱進福求年豐有饗在坐敕予為
害在元中欽哉皓天德不隆承命任禹寫中宮

舜勅天命歌

書帝庸作歌曰勅天之命惟時惟幾乃歌曰股肱喜哉

元首起哉百工熙哉

勅正也時至幾動可以觀天命矣
此二句乃導其意於詩歌之先

舜南風詩

禮記疏南風詩名孝子之詩舜以教天下之孝

見琴類

古今樂錄舜彈五弦之琴歌南風之詩

謝希逸琴論舜作思親操孝之

至也

史記樂書昔者舜作五弦之琴以歌南風注王肅

曰南風育養之詩也索隱曰此詩之辭出尸子及家語
家語其詩曰南風之薰兮可以解吾民之愠兮南風
之時兮可以阜吾民之財兮

舜卿雲歌

尚書大傳舜時俊乂百工相和而歌卿雲帝倡之曰卿

雲爛兮紉縵縵兮日月光華旦復旦兮

崔駰傳注引大傳

八伯

稽首曰明明上天爛然星陳日月光華弘于一人帝乃

載歌曰日月有常星辰有行四時從經萬姓允誠於予

論樂配天之靈

宋符瑞志同

選注大傳曰虞舜歌樂曰和

伯之樂舞玄鶴

呂氏春秋舜自為詩曰普天之下莫

非王土率土之濱莫非王臣

禹九歌

書大禹謨九功惟敘九敘惟歌勸之以九歌 離騷啟
九辯與九歌注禹樂也九州之物可辯數九功之德可
歌 尚書大傳歌大化大訓六府九原而夏道興注四
章皆歌禹之功

湯晨露歌

見樂類 徐陵云紫庭黃竹之詞晨露卿雲之藻 徐
景安樂書曰南風卿雲謂舜之歌也唐歌謂帝嘗之歌
也晨露湯之歌也

文王鳳皇歌

古今樂錄有鳳皇銜書於文王之郊乃作鳳皇之歌曰

銜書來遊以命昌兮云云 又琴論

見琴類

周飫歌

國語衛彪傒曰周詩有之曰天之所支不可壞也其所壞亦不可支也昔武王克殷而作此詩也以為飫歌名之曰支以遺後人使永監焉禮之立成者為飫

周成王儀鳳歌

琴操周成王時鳳皇來舞於庭成王乃援琴而歌曰鳳

皇來儀百獸晨又曰鳳皇翔兮於

一作舞

紫庭余何德兮

以感靈賴先人兮恩澤臻于胥樂兮民以寧

初學記引之

宋符瑞志鳳皇翔庭成王援琴而歌曰鳳皇翔兮於紫
庭余何德兮以感靈賴先王兮恩澤臻于胥樂兮民以
寧

穆王黃竹詩

穆天子傳天子南游于黃臺之丘以觀夏啓之所居獵

革澤

一云獵于鮮山

日中大寒北風雨雪有凍人天子作詩三

章以哀民曰我徂黃竹員閔寒帝收九行嗟我公侯百

辟冢卿皇我萬民旦夕勿忘天子觴西王母于瑤池

之上西王母為天子謠天子荅之曰予歸東土味治諸

夏

漢大風歌 風起詩 高祖歌詩 三侯章

高帝紀十二年冬十月上破布軍于會岳上還過沛留
置酒沛宮悉召故人父老子弟佐酒發沛中兒得百二

十人教之歌酒酣上擊筑自歌曰大風起兮雲飛揚威
加海內兮歸故鄉安得猛士兮守四方令兒皆和習之
上乃起舞慨傷懷禮樂志高祖既定天下過沛與
故人父老相樂醉酒歡哀作風起之詩令沛中兒僮百
二十人習而歌之至孝惠時以沛宮為原廟令歌兒習
吹以相和常以百二十人為員沛吹鼓員十二人藝
文志高祖歌詩二篇張良傳高祖歌曰鴻鵠高飛一
舉千里羽翼以就橫絕四海史記樂書高祖過沛詩

三侯之章令小兒歌之正義三分也索隱云侯語辭詩
侯其禕而是也沛詩有三兮故曰三侯 文中子大風
安不忘危其霸心之存乎 文心彫龍大風鴻鵠之歌
亦天縱之英作也

漢瓠子歌 盛唐樅陽歌

紀武帝元封二年四月作瓠子歌 溝洫志上用事萬
里沙還自臨決河湛白馬玉璧令從官以下皆負薪寘
決河上悼功之不成廼作歌曰瓠子決兮將奈何浩浩

洋洋兮慮殫為河殫為河兮地不得寧功無已時兮吾
山平吾山平兮鉅野溢魚弗鬱兮柏冬日正道弛兮離
常流蛟龍騁兮放遠遊歸舊川兮神戲沛不封禪兮安
知外皇謂河公兮何不仁泛濫不止兮愁吾人鬻桑浮
兮淮泗滿久不返兮水維緩一曰河湯湯兮激潺湲北
渡回兮迅流難蹇長菱兮湛美玉河公許兮薪不屬薪
不屬兮衛人罪燒蕭條兮噫乎何以御水隕林竹兮捷
石菑宣防塞兮萬福來於是塞瓠子築宮其上名曰宣

防 紀元封五年冬南巡狩至于盛唐望祀虞舜于九
疑自尋陽浮江親射蛟江中獲之舳艫千里薄樅陽而
出作盛唐樅陽之歌 文心雕龍栢梁展朝燕之詩金
隄製恤民之詠 武帝集曰悼奉車子侯自為歌詩

漢秋風辭

漢武故事帝行幸河東祠后土顧視帝京忻然中流與
羣臣燕作秋風辭曰秋風起兮白雲飛草木黃落兮鴈
南歸蘭有秀兮菊有芳攜佳人兮不能忘汎樓船兮濟

汾河橫中流兮揚素波
簫鼓鳴兮發權歌
懽樂極兮哀情多少
壯幾時兮奈老何
見文選
文中子秋風樂極哀來其
悔志之萌乎

漢芝房寶鼎天馬白麟朱鴈歌
交門歌

武紀元封二年六月作芝房歌
元鼎四年六月作寶鼎
天馬歌
元狩元年十月作白麟歌
太始三年二月作朱
鴈歌
四年四月作交門歌

漢栢梁詩
唐栢梁體詩

古文苑武帝作栢梁臺

紀元鼎二年春臺建於元鼎二年登臺賦詩乃元封三年也

詔羣臣二千石能七言者乃得上坐帝曰日月星辰和

四時

自梁王以下作詩者二十五人梁王曰騶駕駟馬從梁來至東方朔而止

兩京記

貞觀五年太宗破突厥宴突利可汗於兩儀殿賦七言

詩栢梁體御製絕域降附天下平神通曰八表無事悅

聖情無忌曰雲披霧歛天地明玄齡曰登封日觀禪云

亭蕭瑀曰太常具禮方告成舊唐紀儀鳳三年七月

丁巳宴近臣諸親於九成宮之咸亨殿上謂霍王元軌

等曰甘雨頻降夏麥豐熟秋稼滋榮思與叔等同為此
歡因賦七言効栢梁體曰屏欲除奢政返淳皇太子霍
王相王侍臣並和 天寶十四載三月丙寅宴羣臣於
勤政樓奏九部樂上賦詩數栢梁體羣臣和

漢詔賜詩

藝文志詔賜中山靖王子噲及孺子妾冰未央材人歌
詩四篇

漢黃鵠歌

見祥瑞類 昭帝始元元年作又有淋池歌

漢靈臺十二門詩 歌詩四首

章帝元和二年四月作 靈帝熹平四年正月作十二

門新詩

詳見樂類

章帝親著歌詩四章列在食舉一曰思

齊姚皇二曰六麒麟三曰竭肅雍四曰涉叶相故事有
鹿鳴承元氣二曲合帝作四篇為六

魏文帝詩

黃初六年十月行幸廣陵故城臨江觀兵注魏書載帝

於馬上為詩 詩之入選者芙蓉池居首 有秋風燕
歌行 文心雕龍魏之三祖氣爽才麗北上衆引秋風
列篇或迷酣宴或傷羈戍

唐翠華殿賦詩

高祖武德七年四月丙午宴王公親屬於文明殿見安
平王太妃以尊屬從家人禮降階再拜酒小闌徙坐翠
華殿帝賦詩王公遞上壽賜帛各有差 八年五月乙
巳宴五品以上及外戚於內殿賦詩賜綵 武德中秦

王至涇州召司戶李百藥因賜詩

唐帝京篇

李百藥傳帝嘗與偕賦帝京篇歎其工曰卿何身老而
才壯齒宿而意新 帝京篇五言太宗製褚遂良行書
貞觀十八年八月 序云以堯舜之風蕩秦漢之弊用
咸英之曲變爛漫之音 帝京篇十首見文苑英華

書目太宗詩一卷六十九首 紀成功於慶善之章洽
臣歡於積翠之什賦成威鳳篇著帝京銘玉華之宮贊

王陸之傳假鸞鳳以旌忠力賦勁草以寵誠臣

唐慶善宮賦詩

會要貞觀六年九月二十九日己酉幸慶善宮宴從臣
於渭濱賦詩十韻曰粵余承累聖懸弧亦在茲指麾八
荒定懷柔萬國夷梯山盛入款駕海亦來思單于陪武
帳日逐衛文帳共樂還譙宴歡比大風詩呂才播之樂
府名功成慶善樂 冊府元龜六年閏八月己巳至慶
善宮宴三品以上於渭濱賦五言詩

唐中華殿賦詩

如兩儀殿

貞觀二年十二月乙未宴突利可汗及三品以上於中

華殿帝賦七言詩極歡賜雜綵四年二月己酉又宴三

品以上于是殿

幸洛陽及成翠微宮賜諸亮詩有隔闕相思之句

太宗經破薛

舉戰地詩營砮落星沉陣卷橫雲裂又有執契靜三

邊詩

唐宮體詩

虞世南傳太宗嘗作宮體詩使賡和世南曰聖作誠工

然體非雅正恐此詩一傳天下風靡帝曰朕試卿耳

又云

帝為詩一篇述古興亡貞觀十二年

宮體之號自梁徐摛春坊盡學之

會要貞觀七年九月二十三日上謂侍臣曰朕嘗戲作豔詩世南進表諫曰云云羣臣皆若世南天下何憂不理

唐賜蕭瑀詩

蕭瑀傳貞觀九年

十一月戊午

又參預政事帝嘗曰武德末

太上皇有廢立議瑀不可以利怵死懼社稷臣也因賜

詩曰疾風知勁草板蕩識誠臣 初學記載此詩云勇
夫安識義智者必懷仁 又有賜房玄齡詩 又賦秋
日懸清光賜玄齡云還當葵藿志傾葉自相依

唐詠雨詩

初學記太宗詠雨詩和風吹綠野梅雨灑芳田新流添舊
澗宿霧足朝烟對此忻登歲披衿弄五絃 又有首春初
夏秋日詩秋日翠微宮山閣晚秋守歲詩冬日臨昆明池
臨洛水春日望海望終南山詩入潼關詩浮橋詩初晴詩

過舊宅詩云新豐停翠輦譙邑駐鳴笳一朝辭此地
四海遂為家重幸武功詩曰積善欣餘慶暢武悅成功
垂衣天下治端拱車書同白水循前跡丹陵幸舊宮列
筵歡故老高宴聚新豐於馬歡擊筑聊以詠南風 又
置酒坐飛閣詩 類要太宗儀鸞殿早秋詩羣臣奉和
唐積翠池賦詩

魏徵傳帝宴羣臣積翠池賦詩 實錄賦尚書詩曰日

昃翫百篇臨燈披五典

初學記云報勝玩三墳留燈披五典縱情昏主多克己明君鮮

舊書太宗在洛陽宮幸積翠池宴羣臣酒酣各賦一

事太宗賦尚書曰

同實錄

成名由積善魏徵賦西漢曰終

藉叔孫禮方知皇帝尊太宗曰徵每言必約我以禮也

通鑑貞觀十一年三月庚子上宴洛陽宮西苑御龍

舟泛積翠池

冊府元龜貞觀十一年十月辛丑

一作辛酉

幸積翠池宴五品以上帝曰公等酒酣各宜賦一事帝

賦尚書特進魏徵賦西漢其卒章曰終藉叔孫禮方知

皇帝尊帝曰徵每言約我以禮此語宜記錄

唐幸靈州序事詩

舊紀貞觀二十年八月己巳幸靈州庚午次涇陽鐵勒
回紇等十一姓朝貢九月甲辰諸部落俟斤頡利發等
相繼至靈州者數千人於是北荒悉平為五言詩勒石
序其事 通鑑二十年九月上至靈州諸部數千人咸
云願得天至尊為可汗甲辰上為詩序其事曰雪恥酬
百王除凶報千古公卿請勒石於靈州從之 文苑英
華太宗宴中山詩對敵六奇舉臨戎八陣張斬鯨澄碧

海卷霧掃扶桑 冊府元龜二十年八月幸靈州又幸

漢故甘泉宮詔曰匈奴僭稱驕子分天御於紫宸仰應
髦頭抗大禮於皇極射鵬馳騎亟飲瀚川如矢騰氛頻
驚渭汭朕曩命偏師遂擒頡利今弘廟略已滅延陀雖
則麾駕出征未踰郊甸前驅所轡纔掩塞垣長策風行
已振金微之表揚威電發遠警沙場之外遂使鴈山之
北無復單于龍城之南大開封域契苾等委身內屬朕
當暫幸靈州親撫歸附弘茲肆赦加以施生頒惠天隅

曜威靈朔收其泮海盡入提封解其辮髮並垂冠帶上
變星昴歸於東井之躔下掩踰林祛入南山之圃混元
以降殊未前聞即宜備禮告于清廟仍以大慶頒示普
天

唐凌烟閣賦詩

魏徵傳帝思徵不已登凌烟閣觀畫象賦詩 初學記

太宗詠司馬彪續漢志詩云談叢引泉祕

唐宴羣臣詩

太宗春日玄武門宴羣臣詩有駐輦華林高宴栢梁之

句

九夷造瑤席五狄列瓊筵
娛賓歌湛露廣樂奏鈞天

又正月臨朝詩魏徵顏

師古岑文本李百藥楊師道皆和

初學記

顏師古聖德

頌黃竹麗章栢梁清引沈鬱澹雅疏通敏迅

唐御雪詩

顯慶三年十月八日呂才以御製雪詩為白雪歌

詳見琴類

帝亦製歌詞十六皆著樂府麟德二年封禪十一月

丁酉至平陰頓是日降雪帝賦詩

唐校獵賦詩

顯慶五年三月辛并州童子寺賦詩而還十二月辛未
校獵於長社之安樂川丙子召侍臣蕃客夜宴帝賦詩
以紀講習之事

唐冬狩詩

會要龍朔元年十月五日狩于陸渾

一云南山

上製冬狩詩

示羣臣 初學記太宗有出獵詩冬狩詩

唐咸亨樂章

見樂舞

唐喜雪詩

太宗望雪詩素雪凝曉華 玄宗御製喜雪詩為知勤
恤意先此示年豐 又溫湯對雪詩 校獵義成喜逢
天雪題九韻示羣官 又喜雪詩云朝如玉已會庭似
月猶明 同劉晃喜雨詩繁雲先合寸膏雨自依旬

又製瑞雲篇 張說和云含花雪告豐遙知百神喜灑

露待行宮欲驗豐年象飄飄仙藻來

宮似瑤林
庭如月華

張九

齡和云草木綠早榮京坻宛先積

瑞雪篇雜言

又和喜雨四

言云人和年豐皇心則怡又觀御製喜雪篇曰食者萬
姓之命雪為五穀之精兆且見於祈年律既和於言志
豈比周歌黃竹漢詠白雲 開元八年親製春雪詩春
臺望一章二十八句起居舍人蔡孚奏所製氣雄詞美
德音相屬請示百寮編國史十四年十月幸汝州至溫
湯之行宮親賦雨雪詩示羣臣

唐玄宗和偃松篇 贈賀知章詩

開元初蔡孚賦東都龍興觀偃松篇玄宗賜和御書刻
石紀之公卿以下咸和舊紀天寶二年十二月太子
賓客賀知章還鄉三載正月庚子遣左右相以下祖別
於長樂坡上賦詩贈之

集賢記云上親製詩序
百司餞送賦詩序別

唐開元賜刺史詩

許景先傳開元十三年二月帝自擇刺史景先由吏部
侍郎為刺史治號大理卿源光裕鄭州兵部侍郎寇泚
宋州禮部侍郎鄭溫琦邠州大理少卿袁仁敬杭州鴻

臚少卿崔志康襄州衛尉少卿李昇期邢州太僕少卿
鄭放定州國子司業蔣挺湖州左衛將軍裴觀滄州衛
率崔誠遂州凡十一人詔宰相諸王御史以上祖道洛
濱盛具奏太常樂帛舫水嬉命高力士賜詩十韻帝親
書且給筆紙令自賦賚絹三千遺之

見張說集云賜刺
史以題坐右說

有應
制詩

賜詩云視人當如子愛人亦如傷講學試誦論
阡陌勸耕桑虛譽不可飾清知不可忘求名迹易見安
真德自彰獄訟必以情教民貴有常恤惇且存老撫弱

復綏強勉哉各祇命知予眷萬方

詳見戒吏類

裴寬授太

原尹玄宗賜詩褒餞張暉還鄉帝賜詩及錦袍繒綵

蕭嵩領朔方節度賦詩勞行張嘉貞為定州刺史

及行帝賦詩詔百官祖道上東門御製賜崔日知往

潞州詩揚風非贈扇易俗是張琴餞王暉巡邊金壇

申將禮玉節授軍符風揚旌旆遠雨洗甲兵初送宇

文融安輯戶口送張說巡邊命將綏邊服雄圖出廟

堂三台入武帳八座起文昌

賈曾序云天章賦別御札題賤副衣勉挾纊之誠兼

壺喻投醪之旨

宋璟和云聖酒山河潤天詞象緯明德風邊

地偃勝氣朔雲平

見張說集

又漕橋東送新除岳牧賦詩

送李邕之滑臺十道採訪使朝集使詩開元十年

司馬承禎還天台山賦詩以遣之張東之還襄州中

宗賦詩祖道

昔周遣使臣則有皇華之詩歌馳

驅咨諏之事使有光乎原隰遣諸侯於廟則有臣

工之詩歷道保介新畬之意使無緩乎民事

賜刺史詩

證引

唐宴諸王賦詩 武成殿賦詩

開元十四年十一月己丑幸寧王憲宅與諸王宴探韻
賦詩詩曰魯衛情先重而終勉以為善之樂即日還宮
十五年五月丁丑端午宴羣臣于武成殿有忠正貽
後昆之句各賜衣一副自賦詩六月朔方節度兵書蕭
嵩赴朔方軍命有司於定鼎門外供帳置酒送之帝賦
詩以寵之十二月幸溫泉宮登驪山石甕寺賦詩俾羣
臣和

唐東堂賜三傑詩

宋璟傳開元十七年

舊書八月乙酉

為右丞相與左丞相張說

太子少傅源乾曜同日拜有詔太官設饌太常奏樂會

百官尚書省東堂帝賦三傑詩自寫以賜張說傳上

日敕所司供帳設樂內出醪饌帝為賦詩詩曰赤帝收

三傑黃軒舉二臣云云樂聚南宮宴觴連北斗醇說和

詩曰菊花吹御酒蘭葉捧天詞璟和詩曰聖酒山河

潤仙文象緯舒乾曜和曰鼓鐘崇享禮鴈鷺集朝倫

蘇晉序曰咨日于朔擇時于秋對命天庭受職公府

工備侑饗獻蒸六御拜下以成儀三事自天而來賀秩

秩賓序暉暉旅醺玉緯垂文金漿降醴方將一心天工

勑力帝載爰命在宴乃賡載歌蕭嵩裴先廷宇文融

亦有和詩融詩曰飛文瑤札降賜酒玉盃傳嵩詩

曰入朝師百辟論道協三光又御製同二相已下羣

官宴樂遊園詩萬方朝玉帛千品會簪裾說璟皆有

詩御春明樓臨右相園亭賦樂賢詩

王維集

唐花萼樓賦詩

舊紀開元十八年八月丁亥上御花萼樓以千秋節百
官獻賀賜四品以上金鏡珠囊上賦八韻詩又制秋景
詩 詩云獻遺成新俗朝儀入舊章月銜花綬鏡露綴
絲絲囊 又有賜羣臣鏡詩 突厥傳天寶四載毗伽

可汗妻骨咄祿婆匐可敦率衆自歸天子御花萼樓宴
羣臣賦詩美其事

舊紀元年九月辛卯御樓出宮女宴
可汗妻及男女等 通鑑九月辛亥

唐賜集賢學士詩 宴麗正學士詩

御製送張說集賢上學士詩
廣學開書殿崇儒引席珍
集賢招袞職論道命台臣
張九齡為賜燕序曰食以
樂侑人思德飽說至韋述十五人賦詩
李元紘詩云饌玉還丹禁牋花降紫墀
開元十三年乙丑二月二十七日宴兩相禮官麗正學士御製詩

唐興慶宮賦詩

諸王傳天子於宮西南置花萼勤政樓
帝時時登之或幸第賦詩
御製遊興慶宮作詩
登勤政花萼樓觀

風俗而勸人崇友于而厚睦 從來崇棣萼今此茂荆
枝務本方崇訓相輝保羽儀所希覃率土孝悌一同規
又過寧王宅詩戚里申高宴平臺奏雅歌 又過山

池詩 春中興慶宮酺宴詩夏首花萼樓賞樂賦詩端

午三殿宴羣臣詩

見張說集

帝幸薛王業第置酒賦詩開

元八年幸業第置酒燕樂帝賦詩有常棣鵲原之句

龍池篇張九齡和

唐飲至賦詩

張守珪傳斬契丹首屈刺及突于傳首東都二十三年

春二
月
入見天子

詣東都
獻捷

會籍田畢即酺宴為守珪飲至

帝賦詩寵之

玄宗有平胡二章

登封禮畢洛城酺

宴詩

張九齡和

唐開元鼎實酒醴詩

集賢注記開元二十五年宰相上禮獻壽上御花萼樓

設宴製鼎實酒醴二章之詩以相勸誡各賜宰相五百

匹兼銀器等 中興書目明皇詩一卷凡五十七首

唐賜太子仁孝詩

肅宗為太子天寶八載九月甲午太子生日

肅宗九月三日生

帝製仁孝詩六章札於步障以賜太子令高力士以示
朝臣宰相奏曰宸章煥發睿札凝暉懸日月而齊光自
雲霄而下濟爰於誕育之日勉以仁孝之經上揚祖宗
之美傍考天人之際發揮前古垂範將來凡在衣冠之
流咸知父子之道豈比周稱嗣續造齒胄於上庠漢寵
元良但招賢于望苑望寫六章頒示中外編諸簡策詔

從之

自家刑國
以訓人倫

唐朝元閣賦詩

席豫傳玄宗嘗登朝元閣賦詩羣臣屬和豫詩最工

或云

天寶四年幸
溫泉宮云云

天寶十載十月乙丑御朝元閣有慶雲

見上賦詩羣臣畢和

唐勤政樓賦

天寶十四載三月丙寅燕羣臣勤政樓上賦詩數栢梁
體羣臣畢和

唐謁老子廟詩

宋朝景德四年二月甲戌謁上清宮

宮在洛城北即唐開元中老子祠也

明皇謁廟詩石存焉 玄宗登太行山中言志途次舊

居過晉陽宮渡蒲關經華嶽潼關過王濬墓經河上公

廟次陝州成臯經鄒魯祭孔子遊溫泉皆有詩

見張說集

唐錢李光弼詩

乾元二年八月光弼出統河南諸軍於內殿宴送御製

詩寵之 李光弼傳拜河南副元帥鎮泗州帝為賦詩

以錢

羣臣畢和

張仁愿傳景龍二年秋督軍備邊帝為賦

詩祖道

舊紀三年八月乙未送於通化門外帝製序賦詩

唐王靈芝詩

會要上元二年七月甲辰延英殿御座生玉靈芝一莖
三花親製玉靈芝詩三章章八句曰玉殿肅肅靈芝煌
煌重英發秀連葉分房宗廟之福垂其景光元氣產之
明神合德紫微間采白薜呈色載啓瑞圖庶符皇極天
心有眷王道惟直幸生芳本當我宸旒放此靈質責其

王猷神惟不愛道亦無求端拱思惟永荷天休

唐中和節詩

郭侯家傳夜夢見賜御製中和節詩於金花牋上第二
對首忘一字云茲中和節式慶天地春及中和日百寮
會曲江亭賜御製詩曰肇茲中和節云云其金花牋上花
雲皆夢所見者奉詔同用春字

唐麟德殿賜詩

貞元四年三月甲寅宴百寮於麟德殿設九部樂及內

出舞馬帝製序及詩以賜羣臣於是給御筆仍命屬和

十年九月十日戊子以重陽賜百僚追賞帝賦詩以賜

十一年九月癸卯

舊紀
已卯

賜中書門下及兩省供奉官宴

於曲江帝作詩六韻賜百僚百僚畢和辛亥退朝召百

僚詣延英令中使喻曰屬和雅麗十三年九月辛卯重

陽賜宴曲江賜詩十七年二月癸巳朔賜宴曲江賜詩

六韻九月戊辰重陽亦如之十八年九月癸亥重陽御

製豐年多慶九日示懷詩賜羣臣舊紀賜羣臣宴馬

璘山池賜詩六韻

唐貞元宴曲江詩 中和節詩

劉太真傳德宗以天下平貞元四年九月癸丑宴羣臣

曲江自為詩

製詩序

勅宰相擇文人賡和李泌等請羣臣

皆和帝自第之以太真李紆等四人為上鮑防于邵

一作

于等四人次之張濛等二十三人

一云二十二人

為下與擇者

四十一人惟泌李晟馬燧三宰相無所差次 會要時

重陽節帝賦詩云時此萬機暇適與佳節并朝野慶年

豐高會多歡聲初應制同用清字

詩凡六韻 舊紀同詔簡文士三五十人

應制同用清字明日於延英門進又有重陽言志及豐年多慶詩權德輿和云天文麗慶霄墨妙驚飛鸞

六年二月戊辰朔百寮會宴於曲江亭上賦中和節羣

臣賜宴詩七韻是日百寮進兆人本業三卷司農獻泰

栗各一斗三月庚子百寮宴於曲江亭上賦上巳詩一

篇賜之 十七年二月癸巳朔賜宴曲江亭上賦中和

節賜宴詩六韻 類要德宗以中和節宴百寮詩賜戴

容州叔倫

傳云德宗嘗賦中和節詩遣使者寵賜

舊紀貞元十一年九

月己卯賜宴曲江賦詩六韻賜之 十三年九月辛卯
又賜詩十七年九月戊辰賜詩六韻

唐黃菊歌

韋綬傳九月九日帝為黃菊歌顧左右曰安可不示韋
綬即遣使持往綬遽奉和 玄宗端午日自賦詩

唐章敬寺賦詩

貞元七年七月癸酉中元日章章敬寺賦詩九韻有松
院靜苔色竹房深磬聲之句皇太子進和兼題于壁百

寮畢和後京尹薛珏請以上詩序皇太子書刻于石而

填以金從之

舊紀皇太子與羣臣畢和題之寺壁

唐賜張建封詩

會要貞元十三年徐州節度使張建封來朝

舊紀十月丁丑來朝

及命歸鎮上御製詩以賜之云牧守寄所重才賢生為

時宣風自淮甸授鉞膺藩維入覲展遐戀臨軒慰來思

忠誠在方寸感激陳情辭報國爾所尚恤人余是資勿

以千里遙而云無已知

張建封傳其還鎮帝賦詩以

餞于時馬燧渾瑊劉玄佐李抱真等勲寵卓越未有以
詩餞者建封又賦詩以自警勵 十三年來朝召見延
英殿建封賦朝天行以獻帝眷異賜名馬珍具一本云賦朝天
獻壽詩

唐中春麟德殿觀新樂詩

貞元十四年二月戊午上製中春麟德殿會百寮觀新

樂詩一章十六句

舊紀云宴羣臣詩八韻

令太子書示百官序曰

朕以中春之首紀為令節聽政之暇韻於歌詩象中和

之容作中和之舞聊復成篇詩曰芳歲肇佳節物華當
仲春前度列鐘鼓廣殿延羣臣八卦隨舞意五音轉曲
新顧非咸池奏庶叶南風薰中書門下謝賜詩請頒示
天下編入樂府 金石錄德宗撰麟德殿宴羣臣詩皇
太子誦行書貞元四年六月

唐紫宸殿觀仗詩

見元會類 憲宗 舊紀貞元九年正月庚辰朔

唐喜雨詩

會要開成元年三月庚申幸龍首池甘澤屢降賦暮春
喜雨詩曰郊坰既沾足黍稷有豐期百官屬和

唐賜王起詩 詩笏 賜裴度詩

王起傳加皇太子侍讀文宗題詩太子笏以賜詔畫象
便殿 裴度傳開成三年上巳宴羣臣曲江度不赴帝
賜詩曰注想待元老 文宗賜裴度詩御札曰朕詩集
中要有卿唱和詩 開成四年三月乙酉上巳賜百寮
宴曲江命內官以詩宣賜度

唐夏日聯句

開成三年文宗夏日與學士聯句帝曰人皆苦炎熱我
愛夏日長柳公權曰薰風自南來殿閣生微涼時五學
士屬和帝獨謂公權詞清意足

唐太液亭賜詩

宣宗好儒術或宰臣出鎮即賦詩贈之詞皆清麗大中

九年秋七月甲午

舊紀八月

崔鉉由左僕射為淮南節度帝

餞太液亭賜詩中有七載秉鈞調四序之句儒者榮之

書 舊



玉海卷二十九

欽定四庫全書

子部

玉海卷三十

詳校官給事中臣查善長

主事臣祁韻士覆勘

總校官進士臣朱 鈐

校對官編修臣盧 遂

謄錄監生臣黃臣鵠

欽定四庫全書

玉海卷三十

宋 王應麟 撰

聖文

御製詩歌

太平興國賜進士詩

雍熙

淳化賜進士詩箴儒

行篇

興國二年正月八日己巳宴新進士呂蒙正等於開寶

寺賜御製詩二首以寵之 故事敕下之日釀錢於曲

江為聞喜之飲近世多於名園佛廟至是官為供帳八

年四月辛卯朔賜宴瓊林苑為定制 雍熙二年三月

戊寅

二十日

賜新進士梁顥等御製詩二章端拱二年三

月二十五日賜新進士陳堯叟等御製箴一首 淳化

三年三月癸卯

九日

賜新進士孫何等御製箴一首己酉

賜儒行篇各一軸令至治所著於壁以代座右之誠丙

辰宴瓊林苑御製詩三首賜之 興國三年賜進士馮

拯詩

當考

郭贄傳太宗在晉邸時凡製篇詠多令繼屬真宗嘗訪其賜本贄集為四卷以獻詔獎之 呂文仲傳咸平三年受詔集太宗歌詩為三十卷詔嘉獎 楊徽之傳興國初代還太宗素聞有名盡索所著以數百篇奏御且獻詩稱謝太宗覽之大稱賞和以賜之自是聖製篇什多以別本為賜 扈蒙傳太平興國九年將東封進宣示內外御札草上嘉其文御批紙尾以獎之明年春侍

宴後苑近臣應制賦詩蒙詩末句云微臣自愧頭如雪
亦聽鈞天侍玉皇上曰善因事陳情翌日和以賜之有

珍重老臣之語

時為翰林承旨

太平興國御製獵詩 習射賜詩 咸平大閱

詩

二年九月丙辰

二十

校獵近郊

長編云上始狩于近郊

丁巳御製

獵詩二章賜羣臣屬和九年三月壬申

即雍熙元年

幸含芳園

習射宰臣宋琪贊頌神武與李昉呂蒙正李至等各賦

詩進上和賜之 咸平二年八月丙寅大閱東武村丁
卯賜近臣飲于中書作大閱五言詩

太平興國聞捷奏詩 平晉賦 詩記

四年征河東二月己卯始次欒城則有詩四月癸亥進
次天威則有早行詩甲子次新興有書懷等三詩丙寅
次側石頰有聞捷奏蕩平隆州詩皆賜從官和五月壬
午幸城南自草賜劉繼元詔己丑製平晉賦賜從官令
繼作又製平晉五七言詩各一首俾屬和丁酉製平晉

記辛丑發晉陽有凱旋之賦癸卯回鑾又有書懷之詩
皆令從臣繼和

太平興國新茶詩

四年六月戊午賜從官新茶御製新茶詩詔屬和庚申
車駕北征范陽辛酉次定州御製悲陷蕃民并值雨詩
二首賜從官俾屬和五年三月戊子會鞠於大明殿上
獲多算己丑御製擊毬五七言詩各一首詔近臣屬和
辛卯御製擊毬詩賜近臣屬和八年九月戊午製晚秋

五七言詩二首賜近臣九年八月壬午製四成字四高
字詩各一首賜近臣令屬和

太平興國喜春雨詩

五年三月丙申御製喜春雨詩一首賜近臣俾屬和

太平興國大名凱旋詩

五年十月契丹主親領兵數萬犯雄州乘虛遂至高陽
關十一月己酉詔巡北邊壬子發京師戊午次大名雄
州言契丹遁去車駕即凱旋上作詩示羣臣有一箭未

施戎馬遁六軍空恨陣雲高之句 實錄云興國五年

太宗親征北虜師還帝作詩有鑾輿臨紫塞朔野陣雲
飛之句何蒙采二句為詩賦以獻

太平興國賜趙普詩

八年十一月丁卯宴餞趙普於長春殿上賦詩賜普

普以昭文相節度鄧州上不欲煩以樞務擇善地俾之
臥理因詩什以導意普曰當刻於石上謂近臣曰君臣
之際亦盡善矣 詔齋御詩召陳搏赴闕

太平興國平河歌

九年三月壬子以河決將塞命學士宋白乘傳祭白馬
津沈太牢加璧已未滑州言河決已塞羣臣稱賀先是
河決韓村數州罹災發卒五萬以步軍帥田重進督其
役劉吉副之吉親負土與役徒晨夜兼作至是而塞上
製平河歌賜宰臣宋琪等因謂曰昔漢武有瓠子之歌
今朕聊志一時之事

實錄

壬申幸含芳園習射又製晚

春遊含芳園五言十韻詩一首賜宋琪等乙卯召宰臣

近臣宴後苑上賦詩一章賜侍臣俾屬和

雍熙賞花賜詩

淳化

雍熙元年三月乙丑召宰相近臣賞花後苑上曰朕以

天下之樂為樂且令侍從詞臣各賦詩

賞花賦詩自此始

三

年三月癸酉一日命宰臣李昉等就第為觀花賦詩之會

酒酣各賦奉詔賞花詩帝亦作詩賜之翌日學士扈蒙

等詣垂拱殿門謝九月甲戌重陽詔昉等為登高會又

賜詩二首四年三月己卯十七日賞花宴于後苑上臨池

垂釣令侍臣賦賞花釣魚詩應制者凡二十有六人俄
出五言御詩一章賜宰臣李昉等晚御水心殿習射翌
日庚辰上依韻和宰臣及知制誥而上十三人所進詩
以賜又令和所進應制詩以獻九月起居舍人田錫獻
乾明節祝壽詩二十韻上謂宰相曰錫言事可稱賞因
和以賜之丁丑以為知制誥淳化元年二月己未
詔近臣後苑宴射賦詩上亦賦一章賜宰相呂蒙正等
三年三月二十二日

又見後

幸金明池宴從臣瓊林苑作

遊瓊林苑詩賜近臣五年三月戊午日召近臣賞花宴

後苑上臨池釣魚命羣臣賦詩時應制三十九人上亦

賦詩以賜宰相呂蒙正等因習射上中的者六張樂飲

酒詔羣臣盡醉八月戊子社詔近臣宴于中書御製詩

賜之至道元年九月壬子重陽賜近臣於中書宴飲以

御詩賜之

雍熙賜近臣歌詩

元年十一月甲子上齋宿正殿乙丑宿太廟上以天氣

晴和作歌詩賜近臣令屬和丙寅親享五室出宿于齋
宮丁卯日南至親祀南郊御乾元門大赦改元二年正
月己未上元御乾元門樓觀燈夜漏初上密雪忽降上
謂宰相曰可各賦觀燈夜瑞雪滿皇州詩以為娛樂上
賦詩示羣臣宰相宋琪等咸奉和三年十月庚戌賜宰
相以下宴於樞使王顯第賜李昉御製雜言一篇四年
十二月己亥以御製自勉五七言詩六首雜言詩一首
賜近臣三年六月戊戌朔上以諸將違詔失律作自

勉詩賜宰相李昉樞使王顯等 淳化五年五月庚辰

司空致仕李昉獻詩陳情敘感上和以賜之仍別賜昉詩一首

雍熙宴羣臣詩

元年十二月二十二日丁酉郊祀畢賜宰臣文武等宴于尚書省帝作詩二首以賜其日晚又宣旨曰今日卿等宴會恐未盡歡可更賜來日宴樂羣臣獻歌詩賦頌者數十人並付史館

於是飲三日

實錄十二月甲午召近

臣宴後苑丙申大酺丁酉賜文武常參官詣尚書省宴
飲上賜詩二首 二年四月丙申上幸金明池因幸瓊
林苑習射上為歌詩賜羣臣九月庚戌重陽節賜近臣
宴於李昉第御製七言二韻詩一首賜之十月乙卯賜
近臣宴于樞使王顯第賜御製詩一首

雍熙南至賜詩

二年十一月壬申日南至羣臣詣閣拜表稱賀以御製
詩二首賜宰臣宋琪等三年二月丙辰寒食上製詩賜

宰相李昉等

雍熙雪詩 端拱瑞雪歌 淳化雪詩 南郊

詩

雍熙二年十一月戊子以時雪未降命羣臣分禱京師
祠廟是日雨雪上悅製詩二首賜宰相等令屬和三年
十一月戊寅日南至御製七言冬至詩一首賜宰相李
昉等令屬和丙戌年建隆觀相國寺祈雪十二月乙未
朔大雨雪上大悅其晚御玉華殿宴宰相近臣謂曰得

此嘉瑞思與卿等同醉出御製雪詩一首令屬和四年
正月乙丑製歲日詩一首賜昉等二月戊午製中春遣
懷詩二首賜近臣屬和四月丙申以光州所進綠毛龜
示近臣仍御製七言詩賜昉等七月乙丑御製早秋詩
二首立秋日暮雨詩一首賜近臣丙子中元製五言十
韻觀燈詩賜宰相等八月辛卯朔兵部郎中楊徽之進
雍熙詞五言六韻凡十章上覽而嘉賞依韻和以賜之
甲辰御製春夏秋冬松風雪月烟花詩共五十首賜昉

等又製中秋翫月詩二章歌一首賜宰相九月辛酉朔
澶州進嘉禾製嘉禾合穗五七言詩二首賜昉等乙丑
製五七言六韻菊詩各一首賜近臣辛未翰學蘇易簡
進乾明節步虛詞十章上依韻和以賜十月丙申乾
明節羣臣上壽己亥賜宰相及近臣御製苑中見羣鶴
飛七言詩一首令屬和五年正月庚申御製喜雪五言
二十韻詩賜宰相昉等令屬和乙丑以宋鎬為直史館
進賀雪詩稱旨故也是年改端拱 端拱元年王禹偁

召赴相府御筆命試詔臣僚和御製雪詩序正月丙寅

以為直史館 二年十二月丙辰九日大雪詔近臣宴中

書令各賦詩上製瑞雪歌賜之 淳化二年十一月甲

辰日南至製冬日詩賜近臣三年正月戊戌製朝元及

元日除夜詩各一首賜近臣屬和癸卯大雨雪賜近臣

于中書宴飲御製詩賜之三月戊戌雨沾足直昭文館

李宗諤獻詩三篇上於紙尾批御詩一首賜之

有傳家之子能

文章戊申賜宰相李昉詩一首庚申二十日宴射瓊林辛

百御製遊瓊林苑詩賜近臣八月己卯上賦社日詩六
首賜近臣三年十二月丁卯日大雪數年已來涉冬無
雪至是降及尺餘上喜賜近臣宴於中書詔令盡醉上
賦詩親以八分書遣中使就宴所賜之是日又詔秘書
監李至會三館學士宴於秘閣凡應制賦詩者三十五
人四年正月辛卯合祭圓丘癸巳上賦南郊宿齋五七
言詩六首賜近臣乙未大雨雪上作立春日瑞雪詩三
首賜近臣癸卯辛乾元樓宴作觀燈詩二首并序賜近

臣令屬和十一月甲寅朔日南至上壽丁巳賜近臣宴
於中書上賦詩賜之十二月庚子製立春歌詩三首賜
近臣五年正月甲寅朔上製元旦除夜詩五言各二首
賜近臣俾屬和翰學張洎上表解釋詩意凡數千言甚
稱旨上命宰相召至中書獎諭

雍熙賜近臣詩

見御書

端拱東郊藉田詩

元年正月丙子賦東郊藉田五七言詩各一首賜侍臣
羣臣獻詩賦贊頌者五十三人 是月賜山南東道節
度使趙普御詩又召直史館魏庠已下於中書賜御詩
上親耕藉田普上疏引姚崇十事以諫因求來朝上
允之禮畢冊拜太保昭文相

淳化喜雨詩

淳化二年十二月癸未作喜雨詩賜近臣屬和 雍熙
四年四月殿中丞李度獻春雨詩上謂宰臣曰度苦心

於詩亦可嘉昨進賀雨詩朕特與繼和可召至中書宣

示端拱初度使交州賜詩寵行

有奉使南遊
多好景之句

夏侯嘉

正上元獻五言十韻詩上和之以戒其好進

有狹劣終
難舉通才

列上居
之句

淳化御製刑政稼穡詩 三禮書詩

見御
書

三年四月壬午御製刑政稼穡詩一首賜近臣宰相李

昉等表謝癸未上親真草行小草四體書刑政稼穡詩

各一首以示近臣

淳化秘閣宴賜詩

三年五月增修秘閣八月成戊辰賜宰臣李昉已下及
三館宴賜詩美之

淳化賜詩 四體書

五年十一月丁巳上賦詩一首示翰林學士張洎錢若
水洎因揣摩上意上疏稱述凡數千言上覽而善之召
宰相等賜坐於崇政殿西廡謂曰洎所上表深諭朕意
足以戒躁競之輩矜澆薄之風矣令付史館許衆人就

觀因歎薄俗良久出別賜張洎詩一首

一本云作七言詩示學士以戒

躁競之士末章有純直之訓張洎上表謝上曰洎深又諭朕意宜付史館以塞奔競之源又別賜洎詩一首

出四體書前所賦詩一幅草書者尤絕妙蘇易簡頓首告上乞之呂蒙正亦欲得焉易簡前奏曰臣先請蒙正已不及矣上笑而賜之

至道賞花賜詩

元年三月十六日壬戌後苑賞花特召司空李昉坐於尚書之上帝臨池釣魚賦詩一章賜宰相蒙正等羣臣

應制者五十五人上作釣魚詩斷章意以屬呂端後數

日為相

在四月癸未

九月九日賜近臣宴於中書御製詩賜

之上又賜王禹偁詩一軸至和二年十二月己亥其

孫延已上之詔賜錢萬以御詩還其家

太宗妙覺集歌詩

祥符九年正月庚午譯經潤文官兵部侍郎趙安仁錄

太宗妙覺集歌詩為二卷請以妙覺祕詮為名又錄聖

製法音集論頌贊詩為三卷請以法音精要為名摹印

頒行 祥符二年十月癸巳對輔臣于崇政殿西廡內
出太宗聖製詩御書故事皆有鑒戒示王旦等曰此先
帝朱才人所藏近者上進

咸平南郊詩

二年八月戊午社宴近臣于中書作社日五言詩賜之
屬和十一月丁亥^{八日}南郊禮成宴近臣李沆第作親祀

南郊五言詩賜之屬和五年十月癸卯賜近臣宴作南
郊五言詩賜之 舜歌敕命 周頌告成

咸平賜宴賞花詩

二年八月壬子侍讀學士楊徽之等赴職賜宴秘閣上
作七言詩賜之九月戊子作重陽七言詩近臣屬和三
年二月丙子^{二十}賞花宴于後苑作仲春賞花釣魚七
言詩羣臣皆賦遂射於水殿四年三月己丑後苑曲宴
作五言四韻詩命儒臣賦八月戊辰社宴近臣于中書
兩制館閣于崇文院作七言詩賜之繼和九月丁丑重
陽宴近臣于呂蒙正第作五七言詩咸令繼和

咸平喜聞捷奏詩 景德北征回鑾詩

咸平二年十二月辛亥詔巡邊

九月契丹入寇

甲寅發京師戊

午次澶州甲子次大名府以軍衛列為行陳上躬御鎧

甲子中軍諸樞密介冑以從命王顯宋湜分押後陳橫

亘數十里部伍嚴整丙子詔百官言邊事三年正月丁

亥

十九日

范廷召大破契丹於莫州東斬首萬餘級餘寇

遁逃庚寅奏至百官稱賀

御六師幸澶魏天聲一振虜騎四逃

辛卯宴從

臣于行宮癸巳作喜聞捷奏五七言詩二首題行宮之

壁命近臣館閣屬和甲午發大名府庚子車駕至京師
景德元年九月契丹寇定州王師拒於唐河丁酉上召
輔臣議親征十一月戊辰以李繼隆石保吉為排陣使
庚午車駕北巡癸酉駐韋城甲戌寒甚却貂裘而不御
契丹率衆至澶淵犯前軍西陣有戎帥黑旗幟出大陣
前伏弩殪之即達蘭也丙子次澶淵步輦渡河戊寅御
北城行宮曹利用使契丹還十二月庚辰契丹使韓杞
請盟乙酉御行營南樓觀大河宴從臣丙戌遣李繼昌

使契丹戊子宴從臣于行宮上作北征迴鑾詩

詩曰銳旅懷忠

節羣胡竄北荒堅冰銷巨浪輕吹集佳祥繼好安邊境和同樂小康

命近臣和甲午駕發

澶洲戊戌還京

仁宗慶厯八年三月甲寅幸龍圖天

章閣觀真宗幸澶州詩碑文至和二年三月丙戌詔澶

洲御製親書回鑾詩存于州廨其令刻石藏之

帝于出征祥風

挾轅一鐵星流羣狄鬼神

嘉祐二年二月戊申命宰臣彥博篆書

澶州信武殿真宗御詩碑額

咸平景德祥符賜進士及知貢舉詩

又見後

咸平三年四月己巳賜進士陳堯咨等宴瓊林苑作五

七言詩二首賜之

自後每放榜即賜詩

六月庚戌賜進士齊革等

詩景德二年二月庚子作詩賜知貢舉趙安仁等有夙

夜惟公精攷藝之語四月辛卯宴進士李迪等于瓊林

苑賜五言詩六月甲申賜范昭

河北進士

等七言詩祥符元

年正月丙寅賜進士七言詩二年七月甲子賜梁固等

五言六韻四年十一月丙申賜張師德七言詩

六韻時學士楊

億在告諭旨令赴

五年四月乙巳賜徐奭等五言詩並宴瓊林

范七年十月甲子賜張觀等七言詩八年四月庚申賜
蔡齊已下七言詩

咸平景德賜种放詩

咸平五年九月戊申終南种放入見崇政殿授左司諫
癸丑復召見賜五品服賜五言詩乙卯賜第一區六年
三月請歸丙午授起居舍人戊申宴餞龍圖閣癸丑又
詔館閣餞於瓊林苑賜七言二韻詩三章羣臣皆賦景
德二年五月二十日丁卯放賜告遊嵩山宴羣臣資政

殿餞之賜放七言詩令屬和從臣皆賦復賜會于秘閣
王欽若之直廬三年四月二十四日乙未放歸終南山

召放及講讀待制宴龍圖閣作詩賜之翌日賜宴秘閣

祥符二年四月壬辰七日放以集賢院學士歸終南宴餞

龍圖閣賜七言詩命學士即席賦詩作序

今杜鎬援引名臣歸山故

事翌日內出羣臣詩序示宰臣以晁迥詩楊億王曾序
為優因繕寫賜放時論榮之杜鎬誦北山移文以規

放三年正月甲戌作歌一首賜放曰知卿素尚遂卿懷

或有忠規遠相寄四年四月己未宴近臣龍閣上作送

放歸舊山五七言詩預宴者皆賦 咸平六年十月三

日己未對輔臣龍圖閣觀種放山居圖

放別業在終南林泉幽勝帝命

畫工圖之

郭贄傳拜翰林侍讀學士作七言詩賜之有

啟發冲年晚典常之句 杜鎬傳祥符三年遷龍

圖學士赴上日錫宴秘閣上作七言詩賜之 周

起傳知開封府真宗幸府留燕射堂賦詩命起書

以刻石起請曰陛下昔龍潛於此其正寢非臣下

所宜處請避居西廡詔可因名為繼照堂 薛映

傳知河南府祀汾陰還駐蹕以映有治狀賜御詩
嘉獎

咸平景德祥符瑞雪詩

咸平四年十一月丁亥作雪詩一首示呂蒙正等命即
席賦五年十二月乙丑大雪上作七言詩賜近臣和景
德二年十二月十六日庚寅雪命資政大學士王欽若
宴館閣羣臣帝作七言雪詩令屬和三年十一月癸亥
日南至大雨雪甲子宴近臣作雪詩賜之命與館閣官

皆和四年十一月辛巳十八日雪宴近臣于中書館閣于

崇文院帝作瑞雪五言詩令館閣即席和進兩制次日

來上祥符三年十一月壬子雪上作七言詩賜近臣屬

和己丑大雪賜輔臣飲于中書上作再降瑞雪七言詩

賜之令繼和四年十二月丁未大雪宴近臣上作瑞雪

詩賜之八年十一月甲子作瑞雪歌慶厯六年世續以真宗喜雪詩石

草本
來上

景德元日會朝詩

景德四年正月乙亥朔朝元殿受朝上作元日會朝詩
七言

景德御宴賜詩 龍圖閣賦詩 龍圖閣贊

四年三月七日

乙巳

曲宴後苑初臨水閣垂釣又登太清

樓觀太宗御書及新寫四部羣書又至景德殿放生池
東至玉宸殿歷翔鸞儀鳳二閣命座置酒帝作五言詩
從官皆賦遂宴太清樓下是月十六日甲寅大宴崇德
殿中飲召近臣宴于後苑賞花釣魚帝作千葉牡丹詩

從官畢賦名大理評事宋綬邵煥預焉 二年四月二十一日戊戌幸龍圖閣近臣畢從又召直昭文館种放預焉閱太宗御書又觀諸閣書畫宴于崇和殿帝作五言詩從臣皆賦命李宗諤楊億作序庚子又作贊以賜輔臣

景德賜邢昺詩

四年九月七日庚午宴近臣於龍圖閣之崇和殿餞侍講學士邢昺赴曹州刑部尚書溫仲舒宋白侍郎郭贄

預焉曷視壁掛尚書禮記圖指中庸篇凡為天下國家
有九經事因講大義皆有倫理在位聳聽上嘉納之羣
臣皆呼萬歲即席賜詩二首以寵其行命羣臣咸賦及
行又令近臣祖送會于宜春苑十一月甲戌宴學士郭
贊于祕閣上作七言詩
之賜

祥符賞花詩

祥符元年三月九日庚午召近臣宴後苑帝作賞花七
言詩 三年閏二月二十七日丁丑召輔臣至宣聖殿

朝拜太宗聖容帝作賞景觀花詩以賜從官即席賦詩

又御水心殿垂釣遂宴金華殿小苑花皆太宗命中黃

門所植滋茂異常輔臣所未至也

辛未遂宴近臣于後苑上作賞花七言詩

侍臣皆賦命宋綬晏殊邵煥作序

四年三月八日辛巳車駕駐西京

命從臣射于後苑淑景亭移宴長春殿帝作賞花開宴

詩五年三月二十日丁亥召近臣賞花後苑以雨移御

崇政殿南軒曲宴命賦詩有頃御北殿賜宴作樂帝作

賞花及喜雨詩二首羣臣即席和進八年三月丙申宴

後苑上作賞花七言詩

祥符觀書開宴詩

三年正月二十八日戊寅召近臣觀龍圖閣太宗御書
及四部書籍又至閣西觀畫帝顧謂馬知節曰聞卿別
畫可盡評之知節以古今工拙對即賜酒于閣下帝作
觀書開宴五言詩令即席皆賦又至資政殿觀天尊像
記先是泰山有石像在岩崖間頗多頑缺帝登封見之
因別命修琢易舊像置內庭又出聖製會真宮碑九天

司命天尊殿銘泰山重修聖像記帝復作觀新製太山
銘記五言詩一章王旦等屬和四年十月丙寅觀太宗
聖製作詩

祥符幸射堂詩

三年閏二月丁卯幸開封府射堂又至西堂閱太宗御
書圖畫遂射于射堂上作七言詩從臣畢賦戊辰樞臣
王欽若上駕幸舊邸七言十韻詩上作歌以荅仍詔褒
之

祥符貴康食吟 軫田夫吟 念農歌

三年三月丁酉謂宰臣王旦曰朕自北鄙和好邊陲無
事然居安慮危未嘗敢自暇逸每為文自警置諸座右
朝夕觀之因出貴康食吟軫田夫吟念農歌自戒箴守
官箴以示之

祥符觀龍歌

三年五月二十八日召輔臣於崇政殿北廊觀中使任
文慶於茅山郭真人池中所獲龍長二寸許極細鱗腹

如玳瑁手中仰覆無懼帝作觀龍歌復送茅山池中

祥符御宴觀瑞物詩

三年八月八日甲寅詔近臣觀書于龍圖閣觀瑞物于
崇和殿遂宴于崇和殿帝作七言詩侍臣即席皆賦初
觀瑞物史臣晁迥楊億曰此並聖朝受命之符不載於
史冊望內降名件付史院從之庚申上作七言詩賜永
興軍王嗣宗

祥符御宴御製詩

三年九月一日丙子幸右承天祥符門觀上梁遂宴于
崇政殿帝作五言詩近臣畢和賜從官襲衣金犀帶緡
錢有差

祥符汾陰禮成詩 汾陰聖製歌詩 酺宴詩

西祀還京歌

四年二月丙寅賜百官酺宴凡二日上作祀汾陰禮成
詩就賜之

時在河
中府

丁卯上作五七言詩賜寧王元偓庚

午幸巨靈觀上作西岳真君贊華山仙掌七言詩以示

從臣召華山隱士鄭隱敷水隱士李寧對于行宮上作
詩以賜三月乙亥作駐蹕陝州五七言詩壬午幸上清
宮上作宮銘及七言詩示近臣癸未作遊龍門詩己丑
上作五言詩賜知河南薛映庚寅賜醕宴於河南上作
大酺七言詩二首庚子上作駐蹕鄭州七言詩從臣畢
和四月丁未作西祀還京歌有寬簡育羣生虔恭居大
寶之語賜近臣和庚戌三司使丁謂等請以汾陰路聖
製歌詩命大臣書立石詔令知樞密陳堯叟書丙辰大

宴舍先殿上作慶成開宴七言詩羣臣皆和八月庚戌
以汾陰禮成曲宴宗室輔臣於後苑又射于太清樓下
上作七言詩九月乙未賜酺宴百官於錫慶院宗室於
相王宮上作大酺五言詩賜羣臣和丙申又作大酺五
言詩賜相王元偓已下屬和七年五月乙未作奉祀
禮成述懷五言百韻詩賜近臣館閣屬和

祥符喜雨述懷詩 甘澤應祈歌

四年三月庚辰上作喜雨述懷歌及駐蹕述懷詩六首

近臣畢和辛巳命從臣射于後苑淑景亭移宴長春殿
作賞花開宴詩 八年二月庚辰大雨上作甘澤應祈
歌賜近臣 九年八月甲寅又作甘雨應祈詩

祥符新集御製文頌歌詩 嘉穀詩 御製文

論歌詩 館閣聖製

四年九月丙子秘書監向敏中判昭文館晁迥等請集
聖製藏於館閣詔除已刻石銘記等勉依所奏其餘雜
文篇什或宣賜者並令依次抄錄藏於龍圖閣三館秘

閣不得與太宗文集並處五年四月癸卯以新集御製
文頌歌詩十五卷藏秘閣從敏中請也 實錄祥符六
年七月己未召輔臣觀粟于後苑移御山亭觀粉牌新
書御製文論歌詩復閱御書及嘉禾圖上作嘉穀詩賜
輔臣 天禧四年十月戊午上御龍圖閣召近臣觀圖
籍御製文論歌詩丁謂等乞鏤板許之遂宴資政殿

祥符觀書詩

四年十月戊辰召修玉清宮使丁謂李宗諤觀內殿御

書因命宴上作觀書詩賜謂等十一月丁丑出占城
國所獻師子命近臣視之上作七言詩預觀者咸賦又
作長歌令近臣屬和

祥符元日詩

五年正月己巳朔上作元日五言詩賜近臣和癸未乾
元樓觀燈作七言詩六年正月癸巳朔御乾元殿受
朝上作元日五言詩賜近臣天禧三年正月己未朔
作元日詩

祥符賜知貢舉詩

天禧附

五年正月癸酉命學士晁迥等知貢舉甲戌上作詩賜

晁迥等曰盛時選士貢闈開聲宇聞風獻藝來心似權

衡求實効勿令蓬華有遺才甲午又賜迥等手詔天

禧三年正月丁卯命學士錢惟演等知舉翌日賜御詩

一章二月丁未又賜七言詩二首

祥符賜允寧詩 為政歌

五年正月二十七日乙未帝作七言詩賜允寧等先是

允寧等誦易終篇習虞世南書有楷法帝說其向學故
賜詩獎焉九月癸巳賜楊億七言二韻詩有側席待名
賢之句十月辛亥作為政歌賜輔臣

祥符宴射詩

五年四月五日壬寅幸金明池瓊林苑宴射帝作五言
詩七年八月八日辛酉幸瑞聖苑觀稼射于水心殿帝
作五言詩十月丙寅射太清樓下賜五言詩八年四月
甲寅幸瓊林宴射帝作七言詩九月九日幸瓊林苑宴

射作七言詩五月二日幸玉津園射作七言詩 三年
四月辛未幸城南觀刈麥遂幸玉津園宴射上作七言
詩賜近臣和

祥符綠龜詩

五年四月辛酉後苑池中獲綠毛龜上作七言詩近臣
畢和五月癸酉上以宗室所和綠毛龜詩示宰臣七月
癸巳玉清宮獲綠龜上作七言詩 三年四月甲戌宜
聖殿池獲綠龜上作七言詩

祥符觀稼詩

五年五月癸未幸京城南觀刈麥種稻

三年四月
辛未同

移幸

玉津園宴射上中的者十作觀稼七言詩賜近臣屬和
閏十月丙子出玉宸殿新稻賜輔臣并以聖製七言詩
示之六年四月丙戌幸玉津園作觀稼五言詩八年七
月丙子幸瑞聖園觀稼作五言詩九年五月乙巳城南
觀麥作七言詩

祥符金華殿種麥歌 蠶麥順成詩

五年五月戊子以苑中金華殿所種麥示輔臣復作歌
以賜六月辛丑以諸王所和觀麥歌示羣臣 七年五
月庚戌上作蠶麥順成七言詩賜近臣

祥符瑞應詩

五年六月壬子玉清宮使丁謂言天書閣上有白雲五
色作瑞應五言詩賜近臣屬和九月甲申大宴含光殿
日有赤黃珥直氣五色雲上作七言詩賜近臣和十月
庚申上作司命天尊降臨七言詩賜近臣和 瑤水之

歌 交門之曲

祥符賜諸王詩

五年九月庚寅幸鄆究王宮又宴相王元偓宮從臣宮
僚畢預上作七言詩賜之元偓等奉觴上壽又射于西
南亭復幸元偓元儼宮二鼓而罷議者謂唐興慶花萼
故事無得而比十月丁未上以宗室進和詩示輔臣十
二月庚寅內出御製皇姪允明詩集洎唱和詩二序賜
元偓手詔及詩共五卷示宰臣詔付秘閣

祥符瑞石詩

贊

卷三十

五年閏十月丁丑作舒州瑞石符應七言詩 謁謝啓
聖院太宗神御殿禮畢於龍圖閣取太平興國中舒州
所獲誌公石示輔臣上作詩又作贊名曰神告帝統石

祥符神雀詩 甘露詩

五年十一月三日丙申恭謝玉皇於朝元殿禮畢帝作
朝玉皇觀二鶴神雀詩三首近臣畢和庚子作聖祖降
臨記 庚戌錢惟演言甘露降所居叢竹上作五言詩

賜之

祥符昭應宮賜宴詩

五年十一月庚申昭應宮使王旦赴上手本宮遂賜宴
近臣畢預上作詩賜旦是日雪又作雪詩賜旦等

祥符述古宣德殿詩

五年十二月十四日丁丑召近臣至龍圖閣閱書開宴
觀新修述古宣德二殿又幸資政殿帝作七言詩命即
席皆賦

祥符奉先歌

見饗廟

祥符筆硯歌 連理木詩

六年正月乙巳上作筆硯歌羣臣屬和丁未作觀燈五
七言詩二月丁卯清心殿宜聖殿木連理上作七言詩
二首賜近臣癸酉作紙墨歌賜羣臣和庚辰作寒食詩
賜羣臣

祥符賞花釣魚詩

六年三月五日丙申賞花宴于後苑帝作賞花釣魚七
言詩從臣皆賦又召從臣令觀苑中連理槐屏風連理
栢遂射太清樓下丁酉上作連理槐栢詩三首賜近臣
屬和 六年三月甲午上已宴羣臣上作七言四韻詩
賜近臣九年三月丁巳賞花後苑作五言詩

祥符先天節上壽歌

六年六月壬午上作先天降聖節詔士庶贈遺許王公
上壽歌賜近臣

祥符繼照堂芝草歌

六年八月丙寅作繼照堂芝草歌賜近臣丙戌出御製
靜居集三卷并法寶錄序示王旦七年六月己未晁迥
等請以御製靜居玉宸集等副本於秘閣奉藏從之

祥符嘉雪詩

七年正月庚戌作嘉雪七言詩恭謁太清宮禮畢仰觀
祥瑞歌賜輔臣辛亥作瑞應歌賜近臣

祥符賞花觀書詩

七年三月八日癸巳賞花宴于後苑登太清樓觀書射
于樓下特召知雜御史預會帝作御製賞花觀書二詩
從臣畢賦十月丙寅宴宗室輔臣於崇政殿賜衣帶器
幣以奉祀禮成也射太清樓下賜五言詩

祥符觀書流盃詩

七年三月十日乙未召輔臣于玉宸殿觀太宗聖文神
翰賜宴翔鸞閣又臨曲水浮觴小黃門奏樂帝作觀書
流盃詩二首侍臣皆賦

祥符閔農歌 念邊詩

七年六月丙子棣州涇州流民歸業者給復二年辛巳
作憫農歌賜近臣和 三年三月癸卯作念邊五言詩
賜近臣屬和五年十月乙巳又作念邊五言詩賜近臣
祥符讀十一經詩 讀十九代史詩

七年六月庚辰上作周易詩三章賜羣臣和先是上每
著歌詩間命輔臣宗室兩制館閣屬和而資政殿龍圖
閣學士待制和尤多至是徧詠經史三司諫官御史或

預賡載其大禮慶成及酺會則百僚並賦七月辛亥作
尚書詩三章八月庚午作春秋詩三章九月甲申作毛
詩詩三章庚戌作周禮詩三章十月甲戌作儀禮詩三
章十二月庚辰作公羊詩三章八年正月丁未作穀梁
詩三章閏六月癸巳作孝經詩三章賜羣臣和七月辛
未作史記詩三首八月甲申作前漢書詩三首并注賜
羣臣屬和乙未作後漢書詩辛丑作三國志詩九月庚
申作晉書詩十月辛巳作宋書詩十一月戊申作南齊

書詩辛未作梁書詩十二月己亥作陳書詩王旦等曰
陛下非惟多聞廣記實皆取其規鑒九年正月辛未作
後魏書詩三月癸丑作北齊書詩四月甲申作後周書
詩五月乙丑作隋書詩十月戊寅作唐書詩十二月癸
未作五代梁史詩天禧元年正月壬戌作後唐史詩二
月辛未作晉漢周史詩並并注賜羣臣屬和 其讀十
一經也起七年六月庚辰成於八年閏六月癸巳其讀
十九史也起八年七月辛未成於天禧元年二月辛未

祥符宴羣臣賜詩

七年八月二十五日戊寅眞遊殿上梁召近臣焚香因
宴于長春殿帝作七言詩令近臣繼和十一月壬辰御
乾元門觀酺十一日癸巳賜百官宴錫慶院宗室于瑞
聖園帝作七言詩羣臣咸和 九年二月丁酉寒食宴
近臣賜五言詩三月丁未宴羣臣于園苑上作上巳五
言詩賜之十一月二十三日癸亥召中書樞密院兩制
至刺史以上赴龍圖閣觀書特召楊億呂夷簡馮元預

會帝作觀書七言六韻詩二首分賜寧王元偓及輔臣
王旦等又作七言四韻詩二首分賜學士晁迥以下命
儒臣即席皆賦

亦如景德二年幸此作
詩命李宗諤序之也

乙卯作冬至七

言詩

祥符會靈觀詩

八年十一月辛亥作冬至立仗七言詩丁巳詣會靈觀
上作七言詩賜羣臣甲子詣景靈宮觀上梁作五言詩
瑞雪歌十二月壬午王欽若上承天節夷蠻戎狄同獻

壽歌上和之九年五月甲寅景靈宮迎御書額上作七
言詩丙寅作景靈宮成七言十韻詩近臣畢和六月戊
寅作會靈觀成七言詩賜近臣和十一月甲辰甘露降
會靈觀作七言詩八年閏六月庚寅作七言詩賜童
子蔡伯佈伯佈四歲誦詩百餘篇上召入禁中命為正
字四月庚申作七言詩賜蔡齊

祥符翔鸞閣歌詩

九年二月癸卯召近臣于後苑翔鸞閣觀太宗御書因

示聖製太宗聖文神筆頌玉宸殿記五臣論樂府辭上
作歌詩二篇命從官賦詩移幸流盃殿泛觴登象瀛山
翠芳亭遂宴玉宸殿

祥符資善堂賜詩

九年三月庚申壽春郡王會友張士遜等于資善堂作
七言詩二篇分賜之丁卯以壽春郡王讀孝經序終篇
賜王友張士遜等會于資善堂工作七言詩二首賜王
洎士遜等四月戊戌士遜等請以聖製資善堂記及賜

王詩刻石堂壁從之

正月壬申士遜及崔遵度
為王友上作七言詩寵之

祥符賜向敏中詩

九年六月辛巳宴長春殿餞向敏中作五言六韻詩寵
其行十月壬辰作詩二章分賜龍圖閣待制李虛已李
行簡直龍圖閣馮元

天禧恭謝南郊詩 中和節詩

天禧元年正月十一日辛亥奉天書令祭天地于南郊
士子帝作恭謝南郊七言詩近臣咸和乙卯又作上元

詩二月庚午朔上作中和節五言詩賜王旦已下
三年二月己丑朔上作中和節詩

天禧喜春雨詩

元年正月己未作喜春雨詩賜學士已下屬和
晏殊
謝表曰念及蒸民異周成之儀鳳樂茲瑞應踰漢祖之
飛雲

天禧清景殿書事詩

元年二月作憫農天時地利稼穡省費為政薄賦牧宰

卹刑安民十題共百篇皆有序戊寅召輔臣至龍圖閣

示之

會要

仁宗於乾興元年八月辛亥以清景殿書事

詩二卷賜輔臣

天禧太清樓閱書歌詩

見觀書

天禧觀醵詩 稼穡倍登詩

元年二月壬申三御正陽門觀醵大合樂癸酉宴百官

錫慶院作景靈宮成賜醵七言詩賜從臣和 二年九

月庚午御正陽門觀酺辛巳宴百官錫慶院宗室通王
宮作大酺七言十韻詩勸酒四韻詩分之又以稼穡倍
登詩示輔臣 四年十月壬午上御正陽門觀酺宴宗
室近臣于樓上癸未宴百官宗室作賜酺七言詩賜之

天禧崇徽殿芝草歌詩 皇太子書御製詩

學書歌 勸學吟 資善堂賜歌吟

二年正月庚子內出真遊崇徽二殿芝草圖上作歌一

首五七言詩二首

崇徽皇后
所居殿也

辛亥詣元符觀宴從官于

資善堂出賜壽春郡王歌吟七首

紀云恤黎民等歌

元符觀頌

資善堂記及壽春郡王詩什篇翰

一作筆翰

示輔臣向敏中

等曰王始著吟咏句意精奇揮翰道麗天縱才藝本於

樂善之性咸再拜稱賀八月癸丑賜太子元良箴七言

十韻詩又作七言詩分賜賓客李迪庶子張士遜 三

年二月丁未

十九日

內出皇太子所書御製詩示輔臣帝

作學書歌賜之丙辰又作勸學吟賜太子

進呈學書賜詩五首

帝學云賜王歌凡七軸曰勸學修身懷儉約謹所好卹

黎民勿矜伐守文

天禧玉宸殿觀麥詩 瑞穀歌

二年十月庚子玉宸殿觀古城稻賜宴安福殿上作七
言詩三年四月壬寅作玉宸殿觀瑞麥七言詩賜近臣
庚戌幸玉津園宴射作觀稼五言詩四年八月戊戌出
玉宸殿瑞穀圖示輔臣作歌六首 又三年十月壬辰
召宗室近臣觀西天綠豆小香占城稻上作七言詩三
首賜之屬和 晏殊表曰靈苗嘉穀觀瑞穎於星田仙

翰寶章捧宸辭於龍檢掩蘭菊於漢篇越茨梁於周雅

禹稼蕃滋堯文炳蔚

天禧宴宗親詩 瑞雪詩 宴羣臣賜詩

二年十一月乙丑作冬至詩乙亥作冬至日宴親賢詩

又出聖製三教詩百首歌論九首雜詩一卷賜輔臣癸

未作後苑宴會宗親七言十韻詩賜太子十二月辛亥

作立春詩 二年十月乙未雪上作瑞雪五言詩二首

賜輔臣四年正月乙卯雪作詩五首 三年三月癸亥

大宴會慶殿上作五言詩羣臣畢和丙寅親試舉人上
作七言詩賜羣臣命皇太子書以賜輔臣是日召知舉
錢惟演等對景福殿出皇太子親寫御詩二紙以賜之
王曉楊億李諮再拜請之翌日各賜一紙十二月庚寅
作瑞雪詩賜近臣庚子又作瑞雪詩四年正月乙卯
雪作五言詩五首賜近臣畢和太子書御詩

又見翔
鸞觀御

書是歲三
月庚午也

天禧賞花釣魚詩

三年三月庚午宴後苑登翔鸞閣觀太宗御集聖製又
御儀鳳閣玉宸安福殿遂臨池垂釣射于太清樓下帝
作賞花釣魚五七言詩命皇太子書以示近臣羣臣皆
賦四月癸卯幸金明池瓊林苑作七言詩賜近臣 四
年三月己巳宴會慶殿內出牡丹賜羣臣作牡丹五七
言詩命近臣和 著飛雲之雅什彰滑露之多歡

天禧天安殿賜詩 南郊詩

二年十一月戊辰奉天書于天安殿作五言詩賜近臣

屬和己巳作天安殿酌獻天書薦獻景靈宮五言詩二
首賜近臣庚午朝享六室作太廟致齋五言詩賜近臣
辛未祀天地禮畢上作南郊五言詩賜近臣丙子上齋
長春殿作五言詩賜近臣己卯作大禮慶成五言詩賜
近臣

天禧歲時新詠

三年十二月辛卯賜輔臣御製元良述六藝箴各一卷
承華要略正說奉道詩各十卷歲時新詠三卷 眞宗

御集有詩八十九卷歌十五卷詞四卷樂章一卷樂府
集三卷新詞二卷

天聖清輝殿山水石詩

天聖八年三月壬申幸後苑賞花釣魚觀唐明皇山水
字石于清輝殿因命從臣皆賦歌詩遂宴太清樓翌日

盡取詩付中書第優劣六月丙戌校理韓義以惡詩落

職

王琪歌曰奎鉤粲粲光
芒動羣玉森森氣象新

天聖賜孫奭詩 賜進士詩

見御書

九年十一月十日癸未翰林侍講學士孫奭知兗州賜
近臣館閣官餞于瑞聖園帝作七言詩寵其行詔近臣
皆賦先是閏十月戊辰奭辭曲宴太清樓命從臣賦詩
召晁迥及近臣預帝賜飛白 趙師民知耀州帝自寫
詩寵行目以儒林舊德 李端懿知鄆州帝賜詩寵之
命端明魯公亮知鄭州賜詩一首寵行公亮刊石以墨
本上進

明道藉田詩

明道二年二月十六日辛亥賜百官福酒帝作藉田禮
畢詩七言一首賜宰相呂夷簡等次韻和進己未命夷
簡殊撰藉田記三月丁卯大宴集英殿

景祐賞花釣魚詩

景祐三年三月六日乙酉曲宴後苑賞花釣魚帝賦詩
羣臣席上和進移宴太清樓

景祐化成殿芝草詩 奉禋歌

見樂章

景祐四年五月二十五日丙寅御化成殿以芝草生於

殿楹召輔臣兩制等觀帝作瑞芝五言詩賜宰臣王隨
以下翌日各為詩賦頌以獻熙寧四年五月召輔臣觀
化成殿芝草舊曰玉宸明道元年改四方貢珍果常貯
此殿

寶元太清樓賜詩

寶元二年十一月六日癸巳以皇太子生宴輔臣宗室
于太清樓讀三朝寶訓賜御詩 慶厯四年九月丁亥
召宗室宴太清樓射苑中

慶厯喜雨詩

慶厯七年春旱三月癸巳上下責躬之詔避殿減膳宰相賈昌朝陳執中等乞罷不許及昌朝罷執中再請第降一官辛丑幸西太一宮祈雨徹蓋不御及還而雨羣臣請復膳御殿上乃復執中等官下詔以交修庶職不忘罪己引過之義四月丁未幸西太一宮謝雨壬子御殿復膳又賜喜雨詩一章以勉之

賜二府

又至和二年

五月庚申雨賜喜雨燕于中書

皇祐幸資善堂詩

元年七月壬子朝拜真宗神御回幸資善堂作詩云先
皇教善敞東闈云云疇日學文親政地仰懷慈訓倍依依
堂中藏先朝賜書有楹書乍啓欽遺澤之句

嘉祐賜李淑詩

二年九月十一日翰林侍讀學士李淑出守河中製五
言六韻詩賜之是年九月丁丑龍圖直學士梅摯出守
杭亦賜詩寵其行

嘉祐賞花釣魚詩

六年三月二十五日戊申幸後苑賞花釣魚宴太清樓
出御製詩一首命從臣屬和 四月丁丑賜新進士間
喜燕于瓊林苑遣中使賜御詩及大學篇各一軸 是
歲之夏賜判定州李昭亮御詩一章

嘉祐飛白御製觀書詩

七年十一月二十三日丙申幸龍圖天章閣召輔臣侍
制臺諫官皇子宗室觀三聖御書又幸寶文閣帝親為

飛白書以分賜從臣仍出御製觀書詩一首賜近臣繼

和

命韓琦等屬和

遂宴羣玉殿是日復詔翰林學士王珪撰詩

序刊石寶文閣

紀作丙申

王珪序曰臣琦等二十有八人賡

宸唱以進壬子再召觀瑞物又陳先朝述作之文復宴

羣玉殿大合樂出禁中有醴

本紀實錄庚子召從臣于天章閣觀瑞物

又王

珪和詩云筆迴丹穴鳳歌起沛中雲臣僚應制詩三十

八首

仁宗御集百卷而詩二卷為之冠樂章二卷次之章

聖受元符之錫親作法曲十六章仁宗當景祐之隆聿
修祀典亦製雅歌六十八章

元豐賜文彥博詩

七年三月二日辛丑宴文彥博于瓊林苑賜御製詩以
彥博入覲也 又元豐三年閏九月壬子賜彥博御筵
上自為詩賜之命參政章惇為序詔曰來覲外廷相成
宗祀崇進公品往莅洛師錫燕賜詩昭示殊禮仍敕近
輔序而識之

元祐適英閣賜詩

見前

建炎御製中和堂詩

建炎三年四月壬戌上登中和堂矚稽山思夏后之功
瞰濤江懷子胥之烈製詩五月辛丑張浚至行在復為
知樞密院上親書御製中和堂詩賜浚曰願同越勾踐
焦思先吾身卒章曰高風動君子屬意種蠡臣 淳熙
十一年十一月一日丙戌宰執謝賜太上稽山詩石上

曰太上詩規模宏大所以賜卿者正欲仰體太上之意
如屬意種蠡臣之句 堂在杭州舊治有清風亭望海
樓至和三年杭州守孫沔重修錢氏閱禮堂更名中和
高宗御書謂斯堂偉特之觀無愧上都薰風南來我
意雖快願庶人共之後改為偉觀堂

紹興喜霽詩

紹興十九年太史令胡平言十一月十二日行禮景靈
宮登輦出內天氣開明見帝坐及三台星體明耀十三

日車駕至青城陰霧收斂登壇至禮畢天氣澄肅星月明瑩回鑾肆赦有彩雲之瑞乞宣付史館從之上因是

親製喜霽詩宰輔從臣皆和以進

詩曰氣回粗豆羣工泰喜入魏錄萬馬秋

魏文帝有喜霽賦

文選注

唐太宗有初晴詩

初學記

隆興康壽殿金芝詩

隆興二年三月二十四日作七言四韻詩有永將四海奉雙親之句太上皇御製贊曰律身以道既濟則亨煌煌競秀結液蟠英

乾道賜虞允文詩

乾道八年九月虞允文以少保節度宣撫四川上以詩
送之曰不辭論道虛台席暫假宣威築將壇歸來尚想
終霖雨未許鄉人衣錦看用李綱故事御正衙親酌卮
酒賜之俾即殿門乘馬持節而出都人以為寵 洪邁
跋孝宗御詩謂制作之懿播之詩章與天為徒闢
闔造化蓋與舜元首之歌湯之盤銘漢祖沛中所作相
為表裏自橫汾瓠子以下不足議也 孝宗詠冷泉堂

曰平生雄武心覽鏡朱顏在豈惜常憂勤規恢須廣大

淳熙宴射詩

見射類

賜張子仁史浩詩

淳熙元年九月十八日辛玉津宴射賦七言詩賜曾懷

以下與宴者皆和二年五月十日製詩賜進士詹騏三

年六月一日製詩書扇賜集撰張子仁四年三月一日

製衆妙堂詩賜淮東提舉吳琚十月一日製詩賜少保

史浩浩以舊學錫宴內苑命宿于玉堂翌日有詩來上

因俯同其韻賜之浩恭題御製和詩 季秋壬子錫宴

於澄碧殿命宿玉堂之直廬是夕裁成古詩三十韻上
進陛下賜以宸章俯同其韻有曰躋民期仁壽有曰朕
瘠天下肥見陛下之用心有曰都護萬年觴何當至庭
祀見陛下之立志十一月壬寅召學士周必大至清華
閣上曰朕和浩詩卿可和以進賜詩本並茶墨進和篇
云淳熙視貞觀何帝相表裏五年十月史浩除少傅賜
第城中出御製長春花詩酬和至再示眷留之意六年
六月四日又賜張子仁詩八年八月十一日又賜浩詩

浩丐歸於其行
錫宴以賜之

十一年四月二十五日又製詩餞浩行

淳熙秋日幸秘書有詩

五年九月十二日壬申幸秘書省觀圖書宴右文殿翌
日癸酉內出御製近體詩賜宰臣史浩以下羣臣咸和
又有賞春喜晴因想中原詩苑中即事詩冷泉堂古風

淳熙玉津喜晴詩

十二年三月二十六日車駕宿戒幸玉津園命下大雨
將曉有晴意已而天宇豁然洪邁進詩歌詠四月四日

扈從景靈宮賜聖製云比幸玉津園縱觀春事適霽色
可喜卿有詩來上因俯同其韻春郊柔綠遍桑麻小駐
芳園覽物華應信吾心非暇逸頓回晴意絕咨嗟每思
富庶將同樂敢務游畋漫自誇不似華清當日事五家
車騎爛如花

淳祐講禮記賜詩

六年十月講禮記畢錫宴秘書省御製七言唐律一首
云天高地下禮居中云徹章賜御製詩自此始 十一

年講易終篇賜詩 瓊章寶宇婉墳襲經日星昭回被

物成飾精能之至入神出天白雲起而帝歌翠華飛而

臣賦雅頌之盛與三代同風黃竹白雲垂芳帝籍虞舜

股肱之歌漢皇日月之唱沛邑有歌唐殿有詩然志於

威加未嘗思治安於已欲念不及民 邁殷湯之晨露

掩虞舜之薰風

謝中和節
御製詩


沛筑永言漢臺清什發叢

雲之寶思詢儀鳳之雕章七言超沛邑之歌五字掩芙

蓉之作集靈七字粲星緯以騰華沛邑三侯夏咸韶而

儷曲間持錯寶之跗獨拔飛雲之思沛筑有章柏梁有
詠詩紀靈臺篇述宮體布堯言於天下桀王字於日中
堯思安安周文郁郁東井珠連於五字北辰杓貫於七
言超汾水素波之詠異建章黃鵠之辭堯言炳煥禹律
鏗純麗越汾解清踰沛曲放勛之文有煥帝舜之歌惟
幾日月光華金玉英潤若登羣王之府聆鈞天之奏雖
大風之歌宣房之詩橫汾之誦固不足以比儼睿作之
萬一秦薰風詠叢雲湯製局促於盤銘虞歌澹泊於琴

曲橫汾乃縱賞之事黃竹匪勸戒之文



玉海卷三十